

RIJEČ UREDNIKA

Poštovane kolegice i kolege, uvaženi čitaoci,

Drugi broj časopisa „Univerzitetska hronika“, koji je pred Vama, je tematskog karaktera. Pretežno obrađuje radove međunarodnog naučno-stručnog skupa pod nazivom: „Evaluacija prirodne i kulturno-historijske baštine u funkciji razvoja turizma sa posebnim osvrtom na grad Visoko i Centralnu Bosnu (nova vizija razvoja turizma), održanog u Visokom 15. i 16. oktobra 2009. godine. Organizator navedenog skupa bio je Fakultet za menadžment i turizam Univerziteta u Travniku. Sponzori i pokrovitelji su bili: Federalno ministarstvo okoliša i turizma, Općina Visoko, Rampart d.o.o Visoko, Fondacija „Arheološki park Bosanska piramida sunca“, Turistička zajednica Zeničko-dobojskog kantona, Fakultet za menadžment i turizam u Travniku i Hotel „Centar“ Visoko. Jedan od osnovnih ciljeva navedenog naučno-stručnog skupa, pa tako i radova objavljenih u ovom časopisu jeste afirmacija novog pristupa menadžmentu u turizmu: internacionalnog, etičkog, ekonomskog, tehničko-tehnološkog, inovacijskog, informatičkog, kulturnog, historijsko. Na ovaj način raspoloživi resursi naše zemlje biće prikazani u novom svjetlu što će doprinijeti bržem prevazilaženju negativnih efekata recesije i povećanju ekonomskog rasta i prosperiteta. Najbolji primjer za to su najnovija arheološka istraživanja u okolini Visokog, koja su potakla interesovanje svjetskih stručnjaka i time Bosnu i Hercegovinu svrstala u red zemalja sa zanimljivim turističkim potencijalom.

Radovi u ovom časopisu predstavljaju nastavak istraživanja i realizacije zaključaka sa prvog simpozija u organizaciji Fakulteta za menadžment i turizam iz Travnika, održanog na Vlašiću 14. i 15. marta 2008. godine i objavljenih radova u prvom broju časopisa.

Nadamo se da će sadržaj časopisa zadovoljiti spektar interesovanja šire čitalačke publike a posebno onih koji se bave turizmom, te vas sa velikim zadovoljstvom pozivamo da svojim stručnim, naučnim i istraživačkim radovima obogatite sadržaj časopisa i time zajednički doprinesemo razvoju i plasiranju bogate kulturno -istorijske baštine Bosne i Hercegovine.

S poštovanjem,

Glavni i odgovorni urednik,

Fuad Bajraktarević